

四庫全書

集部

欽定四庫全書

集部  
荆川集卷二

詳校官監察御史<sub>臣</sub>曹坦

中書<sub>臣</sub>劉源溥覆勘

總校官進士<sub>臣</sub>繆琪

校對官中書<sub>臣</sub>范來宗

謄錄監生<sub>臣</sub>卽士洙

欽定四庫全書

集部六

荆川集

別集類五 明

提要

臣等謹案荆川集十二卷明唐順之撰順之有廣右戰功錄已著錄順之學問淵源留心經濟自天文地理樂律兵法以至勾股壬奇之術無不精研深欲以功名見於世雖晚年再出當禦倭之任不能大有所樹立其究也

仍以文章傳然考索既深議論具有根柢終  
非井田封建之遊談其文章法度具見文編  
一書所錄上自秦漢以來而大抵從唐宋門  
庭沿溯以入故於秦漢之文不似李夢陽之  
割剝字句描摹面貌於唐宋之文亦不似茅  
坤之比擬間架掉弄機鋒在有明中葉屹然  
為一大宗至其末年適而講學文格稍變集  
中如與王慎中書云近來將四十年前伎倆

頭頭放捨四十年前見解種種抹殺始得見  
些影子云云則薰蒸語錄與之俱化分別觀  
之可矣其集為無錫安如石所編王慎中為  
之序蓋二人早年論文不合及其老也客氣  
漸盡乃互相傾挹云乾隆四十四年四月恭  
校上

總纂官

臣

紀昀

臣

陸錫熊

臣

孫士毅

臣

總校官

臣

陸

費

墀



荆川集原序

吳之有文學舊矣諸樊為國斷髮之治未變蓋方甚陋而公子札已能盡通易詩書禮樂六藝之文以觀於中國則名卿碩士有愧於其所知悅其說之博雅而慕之如不及孔子教於洙泗來四方之學者則言偃踰江蹈淮而往游焉卒以文學列於大賢之科南方之精華為之盡發而孔氏之道資其言之有文以行於遠至于今為烈蓋其盛如此畫長江大湖以為國方地千餘里林

麓川澤之美殆不可數而光英冲粹之所漸涵磅礴於其間二人而已雖其甚盛而亦豈非難哉吾於二人讀其書觀其言尚而友之而庶幾知其人於今所見而及與之為友又得一人焉毘陵唐應德也君於學蓋所謂得其精華於其言可謂有文而必行於遠者也其文具在學者苟讀焉而思思焉而有以得之則知其心之所通於季札孰為淺深言之所成於子游孰為先後有不可得而辨者矣君仕為翰林編修復為太子司諫皆以



守道直己之志棄去不啻樊蕘有吳公子輕千乘之國  
之節其文之以禮樂得言氏之傳而蘆隅操行必謹於  
一介之取予剛果自斷不可以威武利祿誘屈也尤足  
以闢夫媮懦憚事無蘆恥而嗜飲食之誚上下二千有  
餘歲之間吾謂吳有文學三人焉不為過也季札之生  
其國雖尚陋然先君端委之遺教猶存而子游得仲尼  
為之依歸其成此非難也唐君獨起於千載之後追二  
人者而與之豈不為尤難哉君行年四十其學將進

而不止其為文將日益富而且精予之所見如此已可傳也無錫安君如石子介慕君之學得其所為詩文集而刻之以與同好者共安君之趣尚如此豈凡人之所及哉晉江遵巖居士王慎中道思甫序

欽定四庫全書

荆川集卷一

明 唐順之 撰

策

廷試策一道

臣對臣聞保民所以格天也正百官所以保民也振紀  
綱所以正百官也何則君者代天理物者也百官者行  
君之令而致之民以共亮天工者也百官弗正則下有

倒懸之危而莫為之恤上有子惠之仁而莫為之施而欲民之安也不可得矣紀綱弗振則儉邪者或以矯飾取容循良者或以朴魯見黜任者不必賢賢者不必任而欲百官之正也不可得矣故曰君得臣而萬化行言安民在乎能官人也曰正朝廷以正百官言官人在乎振紀綱也立法以任人任人以安民則人心和而天地之和亦應矣于此見上下交修之責焉見天人合一之理焉蓋自古帝王敬天勤民以致天下之治者其要端

在乎此而不可易也我皇帝陛下上畏天變下究民隱  
臨軒一詔于知人安民二者拳拳焉臣知陛下此心即  
殷湯桑林自責之心也即高皇帝仲夏不雨席藁露坐  
之心也臣雖至愚其于官吏賢不肖與夫民生利病之  
原則草茅之下嘗有感於中久矣况當清問之勤敢不  
悉心以對乎臣謹稽之洪範徵之春秋大抵政善民安  
則嘉祥生政荒民困則災沴作天降災祥在德吉凶不  
僭在人陛下敬一以昭事中和以立極宜乎休徵至而

六沴消矣而顧有不可以常理測者蓋雖天心仁愛欲以助陛下宵旰之憂而隆嘉靖之治意者民之危苦無聊所以感傷和氣者亦容有之乎陛下蠲租以阜民財賑貸以周民急恤刑以蘇民命天下之至仁也其為安民計者至矣親賢去奸以別取舍行久任之法以圖治效天下之至明也其為官人計者至矣而民未必皆安官未必皆得其人者意者賢否倒置授任失宜勸懲未著如聖策所慮者亦容有之乎則夫振紀綱以正百官

以安萬民信不容緩也臣觀知人安民之謨始自虞廷  
發之臯陶之告舜曰在知人在安民禹曰知人則哲能  
官人安民則惠黎民懷之分之以三德三德皆以廣知  
人之旨也詳之以惇典庸禮皆以廣安民之旨也要之  
官得其人則善政行而天下蒙其福官匪其人則橫政  
行而天下受其害約而言之非二致也哲也者成其惠  
者也知人非哲弗能知人而至於能官人則非紀綱之  
振亦弗能也紀綱也者濟其哲者也雖哲如堯舜而三

載考績三考黜陟幽明內則九官十六相以為岳牧之  
倡外則四岳十二牧以任總領之責規為精密斯哲有  
所寄而其為哲也大矣哲大而惠斯大矣仁急親賢知  
急先務此之謂也勲格上下治底平成由此其致也是  
故陛下欲弭災沴則莫若安民矣欲安民則莫若正百  
官矣欲正百官則莫若振紀綱矣紀綱之所以振者臣  
雖不能悉舉請得以其槩言之其一曰精監司以察守  
令臣按永樂中太宗皇帝諭蹇義陳瑛等曰為國牧民



莫切於守令吏部選授皆出倉卒未能悉其才行必察所行乃見賢否其令巡按御史及按察司凡府州縣官到任半歲之上者悉察其能否廉貪之實以聞臣願陛下光昭大訓精擇監司或得於羣臣之公舉或得於睿鑑之獨照必其風采素著秉節剛烈者而後任之其既也果能激濁揚清不畏強禦者量加旌獎其徇私容奸及蔽賢不舉者量行黜責不但以得官吏之賢否而因以為監司之殿最監司憚憲典之嚴孰敢不竭力於旬

宣官吏恃監司之公孰敢不勞心於撫字監司賢而守令亦賢矣其二曰清銓法以彰黜陟臣按成化中大學士邱濬議曰朝制三年天下官吏賫冊來朝六部都察院查其行事未完報者劾奏之以行黜陟後因選調積滯設法疏通之輒憑巡按考語不復稽其實迹錄其罪狀立為貪暴不謹等名以黜退之殊非祖宗初意況貪者未必暴暴者未必貪素行不謹不知何所指名何以厭服其心哉臣願陛下修復舊典申戒銓司核功過勿

循毀譽量才能以責名實曰貪暴必指其為貪暴者何如曰不謹必指其為不謹者何如則人不得飾名以求功而亦不得巧文以避罪矣其三曰信賞罰以激人心臣聞之有官而無賞罰是無官也有賞罰而不足以奔走天下是無賞罰也今也循資而擢之累勞而進之人將曰我資我勞固宜然也富貴爵祿皆若其身之所自致而效報之心薄矣奸吏浚財大刻於民而恒幸其不敗露也不幸而敗露也則止以罷免而幸其不及於戮

辱也則徼幸之心滋而莫知懲創矣臣願陛下離照旁  
通乾剛獨斷政績顯著雖待以不次之位而不嫌於躡  
等貪汙有狀雖加以五刑之誅而不嫌於傷恩或璽書  
勸勵如漢家故事以收其全功或戴罪供職如大誥中  
所以處置朝臣者以責其後效用不測之刑用不測之  
賞以奔走天下而後可也其四曰信命令以敷實惠書  
曰慎乃出令令出惟行易曰渙汗其大號臣竊謂陛下  
有卹民之美意而有司奉行者之未至也陛下嘗下詔

曰蠲租矣賑貸矣卹刑矣然有司之於民也則徵催之苦極矣民之斃於饑斃於刑者過半矣上德隱而靡宣下情迫而莫救凡以此也臣願陛下嚴慢令之戒重沮格之罪限某日至其所于某日蠲租于某日賑貸慢違者必坐以罪而不少姑息焉則庶乎不為虛文而民皆霑實惠也此四者皆以振紀綱而盡官人之道以為安民之本者也若夫除盜賊禦外侮固亦安民者之所當務臣以為其要亦在於得人而已夫民之為盜賊者豈

其本心哉迫於不得已或陷於不知耳故曰豐世無盜者足也治世無盜者化也陛下得良吏如龔遂如虞詡者而任之威信所孚則足以折其氣仁恩所被則足以結其心勸相有方則足以安其業盜賊不期息而自息矣天子有道守在四裔今之諸裔乘間竊發侵擾我邊陲度劉我民人信可患也臣則謂所患者不在諸邊而在戎邊方之無將耳蓋今之所謂將者取諸世胄取諸武舉非不可得人也惟紃綺之習或未熟于經略弓馬

記誦之材或未足於奇正之變也臣請陛下行蘇洵之說令大臣各舉所知勇而有謀可以出入險阻者然後嘗之以治兵寄之以邊障養其望專其任而良將可得矣將良則士練而邊備飭矣至於財充而食足此亦百官有司之事耳百官得其人則經理有道儲畜有方而邦之財可充斂散得宜補助以時而民之食可足要不足以煩陛下也以此言之紀綱克振百官之所以正者此也民之所以安者此也天心之所助順而反災為祥

者亦此也抑臣猶有獻焉中庸曰為政在人取人以身則人固立政之本而身尤取人之本也朱熹曰紀綱不能以自立必人主之心公平正大無偏黨反側之私然後紀綱有所係而立則心者尤立紀綱之本也臣伏讀陛下敬一之箴則于堯舜禹湯文武之心法而為知人安民之要機者固自有在矣惟陛下始終此心弗以隱顯異其功弗以久暫易其守弗以宴安荒其志必講學以涵養此心必親近君子以維持此心由是心純而賢



才輔已正而物自正將不待於慶賞黜陟之及其身而風聲氣習之所加衆正遂彙征之願羣邪沮窺睨之心亦其勢之必至者矣故以之知人則其知如神者也以之安民則其仁如天者也以之除盜賊則如舜之玄德在上而寇賊奸宄者自消也以之禦外侮則所謂無怠無荒四夷來王明王慎德四夷咸賓而禦敵之上策在乎此也即董仲舒所謂正心以正朝廷正朝廷以正百官正百官以正萬民遠近一于正而罔有邪氣干其間

者也即公孫弘所謂心和則氣和氣和則形和而天地之和應者也即劉向所謂衆賢和於朝萬物和於野而和氣致祥者也由是而三光全寒暑時天地位萬物育天不愛其道地不愛其寶諸福之物畢致而王道終矣則夫知人安民以臻盛治又在陛下此心轉移間耳臣不勝拳拳忠愛之至幸陛下垂聽焉臣謹對

故禮部左侍郎薛瑄從祀奏議

陛下懋建皇極身作君師惠然留意理學之臣博採於

庶官之論欲以定祀典而彰潛德甚盛心也夫瑄之為人諸臣論之詳矣臣可無說也臣請折衷之祀典以答明詔可乎臣聞聖人之道有宗傳有羽翼蓋孔門身通六藝者七十人其德行稱者纔四人而夫子獨許回庶幾其三人又不與也一貫語之參賜而性與天道賜又自以為不可得聞則其精微之際心授心受毫釐不差者固亦難矣所謂宗傳者也然文學政事言語亦得與德行分科而居而皆不失為聖人之一體至於門人之

辨之勇之藝聖人亦自讓以為賢於我也且曰自吾得  
其也而惡聲不入於耳自吾得其也而門人加親是聖  
人與人之周也所謂羽翼者也此孔門人物之衡也亦  
後世論孔門從祀者之衡也如使必其宗傳而後可以  
從於祀也則顏曾思孟而下及於濂洛四三鉅儒而足  
矣雖七十子亦有在所略者矣而況於經師之口傳與  
王韓輩之疵而未醇者乎然且羣然而俎豆焉則羽翼  
之故也故曰與其過而廢之寧過而存之至如瑄者以

復性為究竟以持敬凝靜為工夫非聖人之道不以志而學非濂洛關閩之說不以尊而信雖其於所謂精微之際未知其何如也而歷其平生其背於聖人者亦少矣謂其為聖門之羽翼也復何疑乎此瑄之可附於祀典者一也臣聞衆心安定而成俗俗必有尚衆志鼓舞而成尚尚必有倡倡之者始之也祭之為言報也以報本而反其始也我朝理學彬彬乎盛矣然自瑄以前儒者猶汨於辭章事功之習而未有能卓然於道德性命

之歸者也而瑄實倡之矣自瑄以後其有如瑄者繼踵而出乎未可知也其有能直接孔氏之心傳者出乎未可知也而瑄實倡之矣是則瑄其我朝理學之一闢也比之濂洛倡道於宋雖其所自得或有深淺而功則並之此瑄之可附於祀典者二也臣聞之記曰凡釋奠者必有合也有國故則否解之者曰國故云者若虞則夔伯夷周則周公魯則孔子也此代各自釋奠於其代之人之証也而國又自釋奠於其國之人之証也又曰春

官釋奠於其先師解之者曰若漢高堂生制氏毛公伏生也此漢代釋奠於漢之人之證也故夔伯夷周公孔子雖不能接世而生而高堂生制氏毛公伏生固亦非曠世之所希有然而與於釋奠者代有其人則自建學以來皆然未有空一代而絕無其人也明興且二百年絃歌之化暢乎遠近豎子皆知誦法孔氏而璧宮之側至今無一人得俎豆其間者非所以鼓士氣而彰聖朝棧樸之盛也元之世且推其臣許衡而從祀焉我明乃

無一人之幾於衡者其不然矣由此言之苟為聖人之  
徒者猶宜援而進之而況如瑄之真可以羽翼聖門者  
乎如是而曰我國之故也而祀焉以比於漢高堂生制  
氏毛公伏生許衡其亦可以無愧矣乎況今之所謂祀  
者乃其偃然於累代羣儒之後而非如記所謂特祀以  
為先師者也奚不可哉此瑄之可附於祀典者三也臣  
聞周禮大司樂曰凡有德者有道者使教焉沒則以為  
樂祖祭於瞽宗瞽宗者殷學也此學宮祀其能為師者



之證也其釁器舍菜而神之者乃其攝齋鼓篋而師之者也瑄嘗督學於齊魯而諸生翕然尊之曰吾薛夫子也故其時師道之尊而庠序之飭始自齊魯而風於天下蓋在勝國時許衡實為祭酒勝國時之能尊師道而作人材者莫如衡而我朝之能尊師道而作人材者莫如瑄其亦近乎樂祖瞽宗之義否耶此瑄之可附於祀典者四也然或者謂瑄於六經少所著述宜不得與從祀臣竊以為不然夫聖人所為作經者何也以摹寫此

心而已儒者求諸心而有得也是真能發揮六經者也  
且自古儒者說經之多莫如馬融其體認本心絕不肯  
為六經註脚者莫如陸九淵陛下嘗進九淵而黜融則  
聖明昭鑒固有取於躬行妙悟之實而不徒以聞見講  
解為功矣况瑄所著讀書錄且十餘萬言固濂洛關閩  
之緒而六經之旨也其為著述則亦已繁此瑄之無礙  
於祀典者也然宋儒之賢若尹焞羅從彥李侗黃幹皆  
不得與今瑄所得未知其與數子何如乃得與或者亦

有是說臣又以為不然夫瑄之所得誠未知其與數子何如也然自濂洛倡道之後羣儒連茹而出耳目薰染親相授受故其興起為易而瑄獨崛起絕學之後故其樹立為難其連茹而出也不得不擇其尤者而祀之其崛起也不得不援而進之譬如繁星麗空非五緯不能耀芒而晨星相望則維參與昴嚆然而見微顯闡幽之義也安得牽彼以例此乎此又瑄之無礙於祀典者也故臣以為宜如御史臣瞻臣得仁所疏臣愚昧死謹言

荊川集卷一

欽定四庫全書

荊川集卷二

明 唐順之 撰

詩

游西山碧雲寺作得悅字

此下係翰  
林時作

端居滯文翰久與賞心闕出沐乘休豫尋幽展懽悅涉  
澗俯潺湲攀巒面巖嶠邈哉神臯興居然靈境別夷峻  
疏深池塞坎構崇枕浴室盪陽泉水井蔭陰穴躋險惕

暝眩迷迴欣超軼密林嬉猿獼遠峰挂虹霓宵看朝旭  
升晝見昏星列部豐光乍熹崖懸曜先晰景會萬象昭  
跡睽百慮絕巖棲庶可希從茲謝塵轍

慶壽寺齋宿

獨坐花宮月疎鐘報曉晴地超三象外人覺萬緣清如  
素分僧飯觀空入化城真詮今已悟寧畏毒龍驚

寓城西寺中雜言五首

金馬違朝謁雲林久卧疴堦寒鳴蟪蛄庭古蔭藤蘿束

帶知圓減觀書厭快多無人來問疾獨坐似維摩

少年好疎懶遂與性相安經月常忘沐逢人或不冠鼎  
裏金將化囊中玉可餐解言脫屣易豈憚拂衣難

緇塵坐自染白社偶相尋俗子慚玄度名僧即道林三  
生空有偈五蘊本無心說法何須難忘言悟已深

誰言龍藏遠亦在鳳城旁塔湧金銀界筵開功德場常  
明瞻慧月利涉藉慈航沉痾還能遣齋心奉藥王

秋來不覺早落葉忽已繁物化每相代吾生尚何存微

材同樗櫟僻地當丘園竊慕東方子一官堪避喧

同孟中丞游龍泉寺二首

山深人不到僊侶暫相從金馬聯驄馬晴峯映雨峰竹  
嶼今棲鳳花潭舊伏龍方欣窺妙偈遽擬謝塵蹤

寶地風塵絕琳宮日月偏雁來還繞塔龍去尚留泉戶  
裏天花落空中梵樂傳遠師休禁酒客醉欲逃禪

普濟寺同孟中丞作

宛轉雲峰合微茫鳥路通閒來竹林下醉卧石房中陰



礪泉先凍陽崖蕊尚紅攀蘿探虎穴憩石俯鮫宮上客  
思留帶山僧不避驄夜深清嘯發流響入寒空

秋夜

捲帷望秋月月皎心亦清牀下寒蟲響庭前落葉盈漢  
陰鮮機械河上多道情一適萬事畢栖栖何所營

禁中遇雨

紫閣肅陰陰重門寒意深忽看百里霧來作九秋霖灑  
道先清蹕霑花度禁林楯郎方夾陛雨立濕衣簪

夜霽

秋月澄初霽退公方掩閨稍聞金柝動坐望玉繩低巢  
鳥喧餘濕庭花落故畦羈人驚候變燈下理寒綈

十五夜旅懷

暫輟明光草言從洛下游塵沙兩河夕風雨二陵秋鏡  
有潘郎鬢囊無季子裘更堪三五夜獨自下西樓

望太河

北望太行山欽岑霄漢間倚天開疊障畫地作重關車

向羊腸轉人從鳥道還一為苦寒曲淚下摧心顏

山行即事

息馬依叢薄褰裳涉淺沙桃源無俗轍雲谷有人家凍  
壑含朝雨晴峰聚晚霞相期白社裏共聽演三車

泛黃河

曾聞星宿海上與月波連西走昆侖坼東流碣石湮魚  
疑入舟躍馬似負圖傳今日臨秋水望洋私自憐

息中山亭子

相傳昔人醉  
千日酒之地

金匱山房詩集 卷二  
日日塵沙裏深愁行路難孤亭自起曠過客暫盤桓霜  
重飄梧葉雲輕度石欄不能千日醉幸托一枝安

雨霽約孟有涯中丞遊山孟先出郭追之不及  
碧宇陰霏斂青林曉霽分山中期共賞野外復離羣即  
擬追飛蓋猶疑隔片雲行行思無限寒葉落繽紛

送焦提學往貴州

書生非法吏猶跨五花驄山遙迎漢使海國被王風俎  
豆夷酋識侏離譯語通爾鄉有名宦好去學文翁

送李推官赴高州

天子念南陲君才况抱奇祇將經飾律不以吏為師賈  
客多踰海居人半雜夷雖言持漢法謠俗自須知

送蔣藩幕赴閩中

結束千金劍辛勤萬里遊諸侯門下客才子幕中籌風  
鳥鯨波湧寒城蜃氣收自公多暇日望海幾登樓

休沐家居簡陳約之

祇役趨東觀校讐良以疲偶乘青簡暇復與白雲期任

性形骸豁忘機鳥雀知求羊何不至三徑坐相思

送王生歸蜀

明經多不賤嗟子倦遊歸只解攀鱗易何言獻璧非路  
難裝欲盡客久鬢將稀狗監誰相薦成都一布衣

送何學官往金壇

近來稱藝苑大率數江南作師君不忝問俗我能諳家  
擅靈蛇寶人馳白馬談彬彬諸士子莫是出於藍

送陳學官往福寧州

陳生才亦奇年少舉宏詞自信五經笥堪為一卷師衣  
冠閩俗變文字海人知莫即傷淹滯三鱣更不欺

送莫子良擢舉東歸

漢庭方貴少羨爾早翻飛始應公車召旋聞駟馬歸衝  
星看劍氣逼歲換貂衣想到還家日閨中為下機

答陳編修約之柏鄉見寄

菟苑俱將命瓜期獨未歸忽傳千里札坐使寸心違鬢  
髮行來變丹楓別後稀時時通遠夢恍是薊門非

送蔣尉赴金華

分野應星躔金華婺女邊  
微官君勿嘆福地古來傳  
洞有<sub>有</sub>成羊石山多釀酒泉  
即令不好飲猶得學神仙

送程翰林松溪謫居朝陽四首

窈窕玉堂仙漂零瘴海邊  
煙花違北署鴻雁隔南天  
水暗疑藏鯉峰高欲跼鳶  
應聞前席召誰道去經年

天連窮髮國地近卜雞鄉  
禁闕心偏遠關河望轉長  
翻飛看鳳隱消歇怨蘭芳  
此路饒荆棘思君欲斷腸



潮陽何所似雲水日氤氲白晝鮫珠落青天蜃閣分山  
魑迎客旆海若識人文瀟灑韓祠竹清風今到君

南溟君汎棹北地我驅車忽作分飛鳥深慚比目魚啼  
猿三下淚明月兩離居嶺外梅花發逢人早寄書

送孔上公助祭太學歸闕里時賜袞衣一襲

國喜嘉賓至人攀上客行來歸周室禮去入魯王城新  
袞山龍炫餘堂金石鳴聖朝稽古意待爾示諸生

春夕皇甫膳部見過索觀鄙作留夜坐

蓬扉春色徧柏葉夜筵開愧乏凌雲賦徒煩結駟來疎  
鐘出長樂明月照章臺痛飲須投轄何言興盡回

輓張舍人二首

閻老羅  
峯之子

少小侍中郎人稱張辟彊方隨雞樹息忽是鳳毛亡劔  
歌雲間氣珠沉掌上光一經何所託重為相君傷  
象賢超世胄服禮並文儒共羨昂霄鶴翻悲過隙駒藏  
舟人事盡賜履帝恩孤太息張公子哀榮遂爾殊

汲縣謁比干墓

下馬登丘壠，叢林曲隧通。  
碑因元魏樹，地是有周封。  
酒散荒池上，人行秀麥中。  
故宮無可問，徒此對松風。

中嶽

巫閭控北戶，葱嶺奠西隅。  
茲地陰陽合，中天洞壑孤。  
黃樞標正位，紫氣護真圖。  
近接浮丘宅，深藏軒后符。  
疏峰連太乙，列館象清都。  
園宮猶漢築，馳道尚秦除。  
肅肅泥書秘，森森羽蓋趨。  
僊遊微見迹，帝幸暗聞呼。  
露洗千齡栢，霜封九節蒲。  
星榆臨砌發，月英應時敷。  
將訪三山記，

猶迷七聖途今朝陪廣樂直擬到方壺

游嵩山少林寺

淨域龍巖上香臺驚嶺邊山由巨靈闢教以法王傳二  
室圍蘭若三花接梵筵土中元此地檻外即諸天複岫  
低衡岱迴軒寫澗瀍雲衣披雜樹虹影度飛泉綴牖皆  
青壁緣堤盡白蓮神猿叅講幕馴鴿繞爐煙慧月秋逾  
徹泥珠夕更鮮谷將鐘迸響潭共鏡爭圓萬劫終成幻  
三生併是緣願假金篋力一為照迷川

冬至南郊

明王敦大報泰時禮神君位以南離正宵從甲子分月  
臨太乙館星動羽林軍除道疑登岱鳴簫異度汾聲容  
六變合海嶽百靈紛封檢微題字屏帷悉畫雲神光人  
共見天語帝親聞盛跡誰能賦多慚扈從羣

奉天殿慶成侍宴

饗帝在仁人郊雍景命新方看受釐日即是賜酺辰警  
蹕喧黃道衣冠集紫宸宰夫稱燕主蕃國備王賓鵷鷺

千班序魚龍百伎陳鈞天初聽樂玉食共分珍禮厚過  
三爵恩均洽四鄰小臣叨醉飽拜舞祝千春

朝謁長陵

赫赫我文皇恢恢廟筭長定鼎憑天險因山作地藏三  
泉疏鴈海萬壑轉龍荒雲結蒼梧色峰成金粟岡寢園  
馴象守松柏孝烏翔清蹕傳虛谷靈旗隱洞房遺弓仙  
馭遠上食總惟張臣生良已晚幸此拜冠裳

奉命分祀孔廟作

後聖禮先師斯文今在茲將陳百官富詎止一牢祠入室瞻遺器園橋展盛儀樂堪三月聽真想兩楹時執幣元公肅捧璋髦士宜鄙儒叨小相端甫奉前規

觀州中進賀長至表箋恭述時寓信陽

子月開周正朝宗協禹方諸神將受紀四海共迎祥望日扳仙仗呼嵩繞御床天威臨下國星使入明光彤管書雲物黃鍾獻樂章欣逢陽道復願祝帝圖昌

登孫登嘯臺

即阮籍聞  
登嘯處

晉時肥遁士長嘯此山陰  
自遠龍蛇跡能為鸞鳳音  
清淨同河上沉冥異竹林  
坐超惟默理妙契守雌心  
逸駕應難返荒臺尚可臨  
俯看恒衛水遙見太行岑  
砌冷疏花發扉扃落葉深  
寧知千載後更有阮生尋

銅雀臺二首

玉盞從茲闕銅臺空自寒  
分香留故愛同輦罷新懽  
急管銷魂易輕絲續命難  
何因作雲雨彷彿夢中看

漠漠龍髯遠飄飄總帳空  
自憐妾薄命不得奉君終  
望



幸非前日棲靈是舊宮翠襦霑露薤露錦瑟入松風鸞鏡  
時猶照蛾眉歲不同誰能更歌舞心折望陵中

嵩陽宮柏

乃漢武帝所  
封將軍柏

嘉樹植崆峒年長勢更雄已無秦帝幸尚有漢皇封幹  
比孤生竹根猶半死桐靈泉玉女灌甘雨嶽神通葉密  
鶯難度枝樛葛易蒙垂陰九華帳弄影五雲宮色掩重  
巖翠聲含衆竅風賓來虬蓋偃仙去鶴巢空非因不材  
壽春秋自無窮

咏天壇梅花

名卉來南土奇葩曜上方  
花遲疑避雪葉早為迎陽  
靈液滋玄幹仙雲拂素裳  
無言恒斂笑不謝暗飄香  
夕伴芝房月朝承兔苑霜  
飛窺玉女鏡舞撲羽人觴  
擬結千年實先呈五出粧  
帝羹如可和持此奉明光

詠蛺蝶花

蜀地羅裁就蜀有蛺蝶羅  
漆園夢始通何言金翅色  
翻在碧

林中未辨逍遙影爭矜點綴工  
採香蜂趁侶啄蕊鳥銜

蟲易濕緣多粉難飛詎少風美人笑來撲誤使損芳聚

### 皇陵行

皇陵鬱鬱標準甸泗上諸峰盡相面衣冠月出鬼前驅  
劍璽畫局人不見銅井沉沉碧砌寒綠霞隱映紅闌干

碧砌紅蘭松柏裏迢迢複道中天起石馬陰嘶萬歲

山名

雲靈風暗捲長淮水深山大澤兩纏綿白虎朱雀紛後  
先日精月華相迴旋元氣氤氲幾百年憶昔元朝赤縣  
裂爭雄逐鹿俱豪傑一朝此地黃龍飛螭蜺鯨鯢徒滅

血已聞帝王自有真更說南陽多貴人戈矛貔虎三千  
士礪帶河山十八臣江左金陵扶地軸漢家豐沛還湯  
沐復戶蠲租父老歡重門列戟園陵肅羽騎千屯護玉  
魚鬣封數仞堆金粟御碑突兀表勛勞百里無人敢樵  
牧流傳八葉到神孫孝敬先知重本根伏臘丞嘗時不  
後清明寒食更澆酒貂褕中使日焚香豸黼詞官夜朝  
斗新遣撫臣歲祭君不見驪山北邙盡秦蕪五陵佳氣空模糊  
壯哉茲陵從古無天長地久垂鴻圖

從軍行送呂兵曹募兵遼海

邊軍十萬入雲中烽火照耀甘泉宮戰士三春不解甲  
天王一怒欲臨戎追奔盡選流星騎併敵齊分明月弓  
敵氣憑凌恒候月漢兵超忽若乘風已聞舊戍黃花口  
復道新屯細柳中飛沙颯沓迷亭障組練繽紛皆北向  
赤羽朝徵六郡材白茅夜拜五丁將呂郎磊瑩似劉生  
許國從來氣不平匣裏雄韜藏豹變腰間寶劍作龍鳴  
勅散萬金收猛士身騎匹馬出長城鴈行暗結遼西陣

魚貫晴開海上營  
誓同魯仲能飛箭  
豈學終軍漫請纓  
建節行行通大漠  
檄書馬上時能作  
瀚海連雲太白高  
燕然雪照旄頭落  
知君意氣坐相邀  
五百神兵集一朝  
漁陽突騎蛇矛銳  
幽并俠客鐵驄驕  
車上礪人常賈勇  
帳前戲稍屢爭標  
共道千秋王氣壯  
直教一戰塞塵消  
歸來奏凱獻天子  
功名絕勝漢班超

送朱建陽

故人三十北上書  
行到薊門魯棄繻  
故人今去薊門道

雙綬垂腰一何好道旁桃李爛春晴可憐仙令看花行  
殷勤斗酒與君別落花片片如飛雪昨歲春花滿薊門  
垂楊陌上始逢君偶然傾蓋輸情素交歡每會披雲霧  
春來春去能幾時聚散匆匆各自知把袂追攀情未已  
為問閩中幾千里武夷之山天下奇翠壁丹崖共蔽虧  
可但王喬多道氣應傳潘岳有新詩

送陳貢士刺上思州

陳生磊磊衆所羨十年不遇常彈劍本期談笑取公卿

豈意逡巡向州縣憶從少小負才華飄飄逸思凌綵霞  
謝眺詩篇差可擬子雲筆札焉足誇終然獻主遭雙刖  
安事讀書盈五車竭來奔走長安陌人世紛紛笑落魄  
高歌白日無誰知用盡黃金徒自惜富貴浮雲不可求  
且復低眉從薄遊南望桂林雲氣深瘴雨蠻煙多毒淫  
不辭炎海千里路試取冰壺一片心

滎陽行

滎陽軍壘高嵯峨楚漢之戰何其多已向厥倉奪芻粟



還令鴻水割山河大小一百一十戰組練崢嶸如閃電  
存亡呼吸那可知主客縱橫忽然變英姿烈烈紀將軍  
志不可奪身可焚城西夜半赤帝走獨載黃屋開東門  
漢家社稷蕭曹力殺身衛主誰能識君不見丹書白馬  
勒元功吹簫屠狗俱開國

金臺行

君不見七雄割據勢相均得士者富失士貧燕昭信義  
明日月不惜千金買駿骨郭卿談笑吐深謀海內賢豪

競馳突就中樂生尤絕奇按劔魏朝人豈知一朝遇主  
同心腹親屈君王為推轂指麾燕兵百餘萬蹴踏齊城  
七十六于今六合無并吞寂寞古臺空復存少年未上  
麒麟閣且學陸沉金馬門

結客少年場行

長安少年膽氣粗生來恥作轅下駒買交不惜千金產  
使氣能拚七尺軀探丸夜入平陵郭走狗時過渭水隅  
朱門傾蓋爭言晚白首同心不願餘俠士由來重然諾

一言妻子堪相託魯國朱家不學儒洛陽劇孟偏能博  
別有侯王勢絕倫薨薨甲第接天闥蕭朱自倚金貂貴  
班許元稱肺腑親青牛翠幃朝朝合錦瑟朱絃夜夜陳  
門下俱為驚座客堂中皆是報恩人當時顧盼生光彩  
自矜意氣長無改何言榮耀有沉銷雲散星分在一朝  
舊客誰過寶車騎新知盡入霍嫖姚始知富貴多親故  
始知貧賤常辛苦他年北闕競彈冠今日南山空射虎  
積薪前後遞相踰一死一生交態殊獨有子雲甘寂寞

閉門自草太玄書

歌風臺

我來擬上歌風臺，豈意臺空只平地。  
琉璃古井亦崩塌，斷碑無字苔蘚翳。  
當年此地說豪華，富貴歸鄉多意氣。  
枌榆社裏列黃麾，泗水亭前張赤幟。  
里中父老競來窺，昔日劉郎今作帝。  
共談疇昔帝一喙，季固大言少成事。  
椎牛張宴里閉空，進錢今日幾萬計。  
坐中只帶竹皮冠，衆裏長呼武負字。  
酒酣擊節帝起舞，樂極歌殘更流涕。

游子誰不悲故鄉萬歲吾魂猶樂沛賜名此朕湯沐邑  
世世田疇免租稅風起雲飛又一時往事蕭條復誰記  
樵人不識斬蛇藪行客還歸貫酒市臺下黃河盡日流  
瞬息人間幾興廢

同院寮觀閣中芍藥作

西掖衡連翡翠城籠煙裊霧百花明祇謂紫薇初吐萼  
忽言紅藥已敷英紅藥歲隄盛艷陽萬年春色在文昌  
寧同鄴下芙蓉苑詎比洛陽桃李場裁成異辦千般錦

結就同心一樣黃金閣披時渾是畫綺樓臨處并凝粧  
濯枝故向鳳池上裛露偏依仙掌傍仙掌嶙峋對鳳池  
詞郎侍直鷺鴛齊玲瓏玉珮花間映颯拽羅衫葉下迷  
花間葉下情無極含笑含嬌似相識羞將雞舌鬬馨香  
欲取鸛冠並顏色翠幕分看態轉新朱闌斜倚不勝春  
未採孤根助靈液聊持芳蒞贈佳人

南苑

秦園盧橘標炎節漢苑蘘荷駐羽旂雲氣自依雕輦集

星辰故繞畫梁飛  
林行草木皆成隊  
水戲魚龍各合圍  
更取薰風調曲奏  
已看暘谷藉光輝

午日庭宴

南薰應律轉朱旗  
火帝乘離錦席披  
榴吐千花承羽蓋  
冀開五葉拂瑤墀  
冰盤錯出仙人掌  
金縷遙分織女絲  
復道龍舟方競渡  
銜恩共許向昆池

遊龍門

龍門峩截拂雲迴  
鯨浪崩奔動地來  
一片飛泉千仞落

金匱山房詩集 卷二  
百重疊巘五丁開水同瀝澗縈天色山接峭函鎖帝臺  
勝槩依稀似禹穴好奇徒愧馬遷才

龍泉寺對雨

西山爽氣朝來歇倏忽玄陰滿四陲雲裏樓臺翻借色  
雨中花樹更多姿飛虹弄影搖丹嶂瀑水分流射綠池  
坐覺禪宮倍幽寂憑欄把酒正相宜

永年公館夜宿

棲遲異域南冠客嘹唳長風北鴈聲靜院無朋休對酒



高樓有女獨鳴箏霞光曉伴銀河落露氣宵含玉樹清  
古往今來成悵望叢臺孤月向人明

龍泉寺懷顧南田使君顧以公事不至復惠酒

助看山之興

琳宮窈窕碧峰隈歷盡巉巖更上臺不見踏花驄馬至  
虛看送酒白衣來山中泉石誰相賞天末煙雲望屢回  
聞道使君能愛客習池還擬接仙杯

詠崔後渠書屋

碧山學士隱牆東叢菊蕭蕭卷幔中  
開選自須同蔣詡著書元不愧楊雄  
分畦粳稻清溪注對戶峰巒翠靄通  
未許棲遲三畝宅還應密勿五雲宮

題張學士仰宸樓樓藏賜書

瀛洲別館切清虛詔賜綈綈出石渠  
秘典自驚墳索上祥光遙映壁奎餘  
簷前鳥下疑翻字草際螢來為照書  
借問鄴侯三萬卷何如今日沐恩殊

題張學士陽峰卷

陽山秀色滿南州。薜荔叢生楚客遊。  
三峽猿聲偏入夜。千巖楓葉早知秋。  
僊人結宅雲煙近。太史藏書洞壑幽。  
便欲焚魚應未得。共言明主待謨謀。

送張學士歸蜀省親

曳履暫違金馬署。承歡遙入錦官城。  
欲從狄相雲間望。却向王陽道上行。  
旌轉層峰朝雨色。舟迴極浦夜猿聲。  
到家已是初冬候。聞道林中笋又生。

潞河別林汝雨提學浙江

君去會稽何日到諸生湖上待花驄  
定因立雪知游酢不獨傳經似馬融  
行載圖書邀海月坐移帆舸信江風  
剡溪見說好山水苦欲相從奈轉蓬

送黃叅政赴陝右

黃子風流世絕倫翩翩江海謫仙人  
紫薇開府勞分陝白馬乘春遠入秦  
三輔煙花迎使節五陵豪傑望行塵  
丈夫得意應如此誰笑蹉跎白髮新

送項膳部遷之南行兼呈劉祠部

春流瀾瀾碧波深送遠其如南浦心  
魏闕幾年叨結綬江臯千里惜分襟  
君行白下貪雲卧予滯金門笑陸沉  
郎署故交如問訊邇來惟有越人吟

送高行人使琉球

天王玉冊頒三殿漢使星槎下百蠻  
鬼國至今通象貢樓船何處度龍關  
海迷南北惟憑日雲起蓬壺忽見山  
壯志不愁經歲去安流應是計程還

送王侍讀赴南都

玉堂學士賦南征躍馬鳴騶出上京奉詔明光新佩印  
校書天祿早知名石頭城下春流滿白鷺洲邊芳草生  
此去周南異留滯看君到處即蓬瀛

送樊大夫會朝長至

中宵緹室吹葭管候曉玄堂駕鐵驂天子迎陽疏玉戶  
羣方獻壽拜金函預占黃道卿雲見漸覺朱城淑氣含  
擬欲從君觀盛典使星猶自滯周南

送周雲卿之任通山

湖南此去意何如  
綠浦清楓萬里餘  
地僻且看衡岳雁  
官貧豈食武昌魚  
千家鑿井分江水  
幾處開田傍石渠  
由來撫字惟良牧  
天子他年有賜書

寄周中丞備禦關口

牙旗高建白羊東  
鼓角殷殷瀚海空  
雪後錦裘行塞外  
月明清嘯滿樓中  
幕南五部思歸義  
薊北諸軍盡立功  
燕領書生人共羨  
一朝投筆去平戎

送施貢士子羽南行

何用相逢歌莫疑感君落魄不勝悲長鳴自許驂騑並  
高志寧求燕雀知已道羣公能倒屣也應天子幸同時  
金陵樓閣秋雲裏肅肅遙瞻鴻漸儀

送人上陵作

玉園霜露向秋澄節序初臨祀事興恭將圭璧朝羣帝  
遙奉馨香薦五陵祠壇渺渺神光下路寢熒熒燎火升  
宣室于今敦孝感還歸早慰聖情凝

覽任少海吏部慶都留題悵然懷人因次其韻



帝京冠蓋同遊日曾忝聲名李杜齊  
碧樹不堪思遠道綵毫何意覩新題  
書傳劔閣鴻猶阻月滿燕關鵲未棲  
尊酒論文那更得暮雲回首雪峰西

贈袁御醫芳洲

家本東南海上村翻因避世向金門  
熊經自信窺真訣鴻寶還將獻至尊  
鳴佩偶隨供奉侶下簾長對道家言  
山人不厭少生事種橘年來滿故園

張相公壽詩

帷中運策九州清共說留侯在漢京  
賜第近連平樂觀  
入朝新給羽林兵  
儒生東閣承顏色  
酋長西蕃識姓名  
却望上台多氣象  
年年長傍紫宸明

趙州懷古

千秋霸業消沉盡  
風俗猶傳趙武靈  
市上美人揮錦瑟  
場中俠客舞青萍  
雁門北去通沙磧  
鳥道西來入井陘  
欲向平原訪公子  
蕭蕭賓館戶長扃

呂翁祠堂

世所傳邯鄲夢者也

呂翁祠堂漳水曲高秋爽氣何氤氲松間隱隱鳴仙樂  
簷際時時駐彩雲浮生一夢誰能度羽客千年不可羣  
未須白首牽朱紱欲向丹丘訪赤文

題劉蒼祠

歲暮江山搖落時客來下馬入荒祠獨傷往事堪流涕  
欲問遺墟不可知璧玉無因終易棄龍鱗有逆竟難披  
今日登科還我輩對君顏厚更何辭

朱仙鎮觀岳將軍廟

丹書畫壁閃旌旂想像勤王轉戰時  
黃屋未歸南狩駕金牌已罷北征師  
平蕪漠漠前朝隔曠野陰陰暮鳥悲  
惟有西湖原上樹春來猶發向南枝

和陳編修約之禁中雪詩二首

建章今旦滿清輝朔雪繽紛應候飛  
忽飄九陌從風散漸積千門待日晞  
素影偏搖宮女扇輕花欲上侍中衣  
最是相如能獻賦霑恩新向菟園歸

霽霽同雲覆帝畿銀宮玉宇特相宜  
飛花遍入披香苑

積絮微消太液池三署曉光凝劒佩九門寒色映旌旗  
亦知聖主揮天藻不羨周家黃竹詞

詠夾竹桃

海南有桃枝竹  
故首句云云

桃竹舊傳生碧海竹桃今見映朱欄春至分香能共遠  
秋來花葉不同殘疎英灼灼分叢發密蕊菲菲對節攢  
不信千年將結子錯疑竹實待棲鸞

和詠霧中榴花

仙曹飛霧曉氤氲幾樹珍花望不分纖萼蒙茸俱襲錦

高枝撩亂稍披雲初疑葉上緇塵染轉覺叢中淑氣薰  
為問江頭歌絳采何如玄女裊清芬

江海石榴實  
曰紅花絳采

九月晦日鈞州公館見菊

天涯已逼三冬候客舍仍開九日花無那繁霜經雨歇  
獨看疎蕊向風斜  
食英實有騷人興送酒虛疑陶令家  
想像故園搖落盡倍令遊子惜年華

村居二首

此下係前  
家居時作

偶然灌園興不是學於陵  
醉卧松間月行攀巖下藤  
睢

予竊自愧捫闔又無能惟應白社裏談笑共高僧  
山人頗好事蓬戶掩還開四野綠禾滿三秋白雁來授  
衣裁短褐飲蜡獻新醅即此堪投老栖栖竟何哉

村夜

纖月生西浦流光照北林羣喧一以息百籟相與吟始  
悟丘園裏能生清淨心悠悠何所嘆獨坐撫瑤琴

同皇甫子循遊橫山二首

曲磴行來盡松陰轉寂寥不知茅屋近却望石梁遙葉

響疑聞雨渠寒未上潮夫君軒冕客此地欲相招  
常時思獨往坐為塵事攪幸接金門客相攀桂樹榮峰  
微片雲度谷靜衆禽鳴何年將結社與子共逃名

夜宿王氏莊

微月掛孤壁四山何悄然因穿蘿徑去忽造竹林邊叢  
木深寒氣平蕪淡野煙徘徊興復盡還就茅齋眠

暮春游陽羨南山四首

清谿知幾曲惟見白雲深一入薜蘿徑欣聞樵採吟春



鶯未停囀夏葉始繁陰乘此縱長嘯悠然物外心

洞口石縱橫流泉復有聲柴門何處入雞犬自相迎靈  
草知昏曉時禽識雨晴非因罷官久誰得此間行

到處暗杉松多言路不通却從青嶂外轉入綠園中谷  
口逢茶女溪邊狎釣童勿嫌疎散甚吾亦是愚公

花落已成蹊村村綠葉齊一園通蝶戲千嶂隔鶯啼澗  
草多名蕙山人舊姓嵇窮歡猶未返忽是夕陽西

同林尹遊會真菴

言尋仙子宅窈窕傍清溪望氣行應近穿雲路轉迷人  
閒多戲鹿樹老更棲雞願得使君姓留將石上題

游馬跡山宿許道士房有贈二首

獨住水中央言修不死方開簾見白鳥隔院度清香機  
息何妨奕神全可却糧偶來分半席遽使世情忘

四週環積水信此羽人居鳥下忘機後猿窺搗藥餘閒  
尋漁父伴自註道家書笑我勞生甚逍遙爾不如

題閭泉川副使莊

閭侯貧已甚尚有種瓜田潭巖相映帶農圃與周旋刈  
秣盡供酒賣蔬時得錢躬耕豈不苦所貴無牽纏

謝病贈別高叅政子業

逝將歸舊林復此別知音縮魚慚分薄解劍感交深目  
送三河使身分十畝吟從茲一相失長嘆隔飛沉

罷病歸訪王山人含真

一與山翁別年華每自傷還因解龜後重問養雞鄉蘿  
薜窻中影鉛砂枕上方鴻蒙常不語何以答雲將

送王良醫往岷府

獻方曾待詔何事向江干  
帝側無人薦王門且自安  
青楓連遠道白首寄微官  
莫惜囊中秘淮南欲合丹

贈春巖王尹朝京

赤縣神明宰如君最少年  
無言似桃李有志笑鷹鷂  
得暇即開卷長貧不受錢  
此行人共羨名在御屏前

送白尉往湖州

君家太湖北作吏太湖南  
驛路雞鳴近山城樹影含萬

川疏沃野百室競春蠶幸此猶吾土微官也自堪

送胡主事權稅荊州

南州饒齒革此去豈徒然言徵山海賦用助水衡錢井  
邑千金市江門百丈船錐刀未可算寬大見君賢

丹陽別王道思三首

久已廢逢迎蕭然世外情因君訪茅屋相送到江城遠  
岫雪中綠寒流冰下行可堪此時別獨自返柴荆

卧病不知久見君三徙官還將鶡冠賤來伴芣衣歡秉

燭驚宵曙同衾屬夜寒平生學禪寂猶自別離難  
書生多落魄羨子最逢時繡服官方顯青衿職所司鑄  
人稱道術倚馬見文辭徒抱彈冠意迂疎自可嗤

夏日聽沈君彈琴詩三首

山居足清賞獨恨不能琴偶接青谿客因聽白雪音寒  
暄乍翻復丘壑轉深沉誰道嵇中散風流更可尋  
知君技入神一歇一番新撥處疑非指聲中似有人空  
山鳴落葉暗水躍潛鱗何獨吹簫客能生陰谷春

忽聽使人驚空山迸一聲能令草樹裏齊作秋蟲鳴暫  
與松風遠還同石磴清曲終人欲散纖月照南楹

贈宜興張醫二首

脩然一逸民山郭往來頻乞藥從貧士傳方自異人草  
間收伏菟澗畔煮香蓴嘆息市中客誰知百歲身  
生長白雲巖仙書宿所探千金方不惜百草味俱諳採  
藥行山外藏身住市南獨抱文園病逢君試一談

次韻贈陳后岡

昔日京華居同君直玉廬蛾眉寧見妬樗散自知疎佩  
印紫薇署垂綸滄海魚為農吾已矣作吏子何如

九月八日作

日日閉門坐今朝復如斯窓中見風雨始知重陽期海  
燕已辭主黃花未滿籬余心久委化何用惜良時

送真州蔣生至宜興親迎歸

相門甥館得才郎文藻翩翩貌復揚十年久著鳴金賦  
一笑今游射雉場江南江北路非遠幾月辭家猶未返



他鄉芳草自相留  
今夕佳期未為晚  
歸去春洲漲綠濤  
滿川桃李送蘭橈  
若使長江作天漢  
應言仙女度星橋

送莆田方生自宜興歸應試

聞君誦詩滿三百  
十年落魄常自惜  
書生只是數多奇  
俗子空嘲玄尚白  
那能環堵事窮愁  
乘興飄然賦遠游  
荆溪山水清且美  
屢月貪歡猶未休  
荆溪茂宰君妻弟  
思君不謂君能至  
山坳水曲日追隨  
相對渾忘鄉土異  
君不見荆人削足  
售良玉好醜由來  
隨世俗期君此去

早揚眉一戰能亡三敗辱

送林宜興遷官南部

移家偶愛山中靜地主何煩重相敬  
吾生恥學茂陵郎如君豈是臨卽令  
誰言陋巷不容車勞君擁蓋常造廬  
誰言簿書日紛糾勞君為我頻置酒  
五月清溪暑氣微淹留竹裏共忘歸  
乍看朝霞初冒嶺忽驚夕露欲沾衣  
清才自合翻飛早一朝西上金陵道  
請君別後數寄書山中相識日應少

題東石草堂圖贈黃松江

連山斷若缺一溪百餘折古松三四株爪秃骨半枯聞  
道閩山乃有此誰將輦載來東吳松江太守好靜者迹  
在風塵心在野若欲還山未得還故託良工為摹寫太  
守昔年卧茅荆日日看山無俗情醉來向東拜白石誓  
與此石同死生豈謂金門被羈束復向名藩分虎竹橫  
金衣錦世無比太守只言非所欲乃知碧山不負吾駟  
馬高蓋胡為乎有時吏散重門閉焚香獨隱烏皮几披

圖相對一莞然不覺逍遙數峰裏樵人漁子似相識手  
招兩鶴勢欲起扁舟却在窓戶間便欲乘虛泛清泚真  
邪假邪何足問世間萬事亦寄耳

雙壽圖歌為段翁作

是誰寫此大椿樹爪牙縮張相攫吞輪菌偃蹇據絕壁  
氣凌萬木皆兒孫似鼻似口挺奇幹半枯半嫩蟠靈根  
千年神物照魑魅滿山精怪爭崩奔樹上懸泉始一線  
飛洒樹裏成千片匡廬瀑布不可尋忽向今朝眼中見

立石復似五老峰雲氣模糊露頭面可憐此樹與雲石  
蒼然一色誰能辨石間異草何其多紫芝伏兔森交羅  
仙萱自是百草長緋葩翠葉呈婀娜上承老樹賴嘉蔭  
亦如松柏掛女蘿蕭然相伴歲月晚長養齊霑雨露和  
吾鄉段翁住東郭夫妻七十鬢未禿翁家猶子擅丹青  
手揮絹素為翁祝一枝一莖亦有情五百春秋遞相續  
請翁披圖應自笑形固可使如槁木

贈王君五十歲

金史卷之三  
卷三  
君家城市裏終歲常閉關青松白日滿庭內不許俗人  
相往還看君本是山澤懼年來戰勝身亦肥但道龐公  
堪自老何須遽瑗更知非

題龍圖

世人畫龍得龍皮叔也畫龍得龍髓當其停手凝思時  
青天颯颯生風雨却怪三年不點睛那知一日飛騰去

山莊閒居

身名幸自謝龍樊白首為農誓不諼慣住山中知鹿性

數行樹下識禽言巾車每許鄰翁借書帙間同道士翻  
醉後漸看松月上滿村雞犬寂無喧

遊神墩寺次壁間韻二首

新雨郊原草木柔葛巾藜杖此尋幽藤垂小徑蟬聲滿  
苔合荒庭鳥跡留隱几翻經聊習靜憑高望遠一銷憂  
相逢更是煙霞客攜手同為汗漫遊

古藤千尺猶自柔布葉垂陰滿院幽楓樹暗隨清磬響  
山人欲去白雲留談玄幸有食霞侶違世已無食肉憂

不識老僧蓮社裏可容携酒日來遊

登墩

此墩可望茅山

藂竹裊裊迎風柔古墩掩映清湖幽斷煙白鳥雙洲遠  
落日青山半景留耳聽鳴蟬知換節坐移芳草覺忘憂  
興來更望華陽頂想見仙人駕鶴遊

廣德道中

蒼山百轉見炊煙茆屋高樓古樹顛細雨薜蘿侵石逕  
深秋梗稻滿山田雲中望影迷遙岫草裏聞聲覺暗泉



倘遇秦人應不識只疑誤入武陵川

泊淮上作

楓林望盡見蒼山  
桐栢飛流入楚關  
潮散海門孤島出  
月明渡口數帆還  
客夢祇驚青瑣遠  
滄波長羨白鷗閒  
聞道淮南多桂樹  
朝來杖策一相攀

淮上五日泛湖同蔣別駕世和

青蘋裊裊漾微風  
輕舸逍遙暫此同  
客裏綠蒲驚節換  
尊中清酒覺愁空  
一徑荻蘆行不盡  
數洲魚鳥戲相通

向晚前川簫鼓發猶疑風景似江東

聞復官報寄京師友人

姓名不復挂朝參魚鳥由來性所耽  
篋裏符經都已廢山中藥草漸能諳  
踈狂自分三宜黜懶病其如七不堪  
深謝古人推轂意莫將陽羨比終南

代東寄京中舊游

莫須彈鋏嘆無魚自愛山東構草廬  
雨後亂蛙生故竈秋深落葉伴閒居  
身隨老圃偏能慣論學潛夫愧不如

故人休訝無相訊中散從來懶作書

寄贈曾郎中再入禮部

文昌秘省倍光輝傳道仙郎去復歸  
三署會應尋舊草五時猶得賜新衣  
官閒常似遊丹壑賦罷多堪獻紫微  
徒使昔年同宦侶頻於清夜想音徽

家居贈別陳僉事約之

已甘蹤跡滯丘樊暫逐行麾思欲翻  
才薄最宜明主棄身貧獨感故交存  
蒼苔掩徑誰相過芳草懷人未敢言

知君王事方鞅掌不記於陵長灌園

臨清十五夜柬陳太史約之

行人向月占消息一望雲端百感并南去關山猶未半  
東升蟾兔已先盈乘槎且傍魚龍宿繞樹那堪鳥鵲驚  
憶與仙郎當此夜幾回聯珮侍承明

贈陳僉事約之生日

青春綉服儼神仙早歲為郎霄漢邊問齒方知散騎後  
論才已是洛陽前官遷栢府多推望經絕韋編不待年

衰病無能真自棄慢將犬馬愧君先

崔鎮道中晚望懷陳約之

郊原極目思依依楚水連天楚樹微遠浦潮生人獨往  
寒林風靜鳥雙歸泥塗自覺朋遊好日月偏催旅鬢稀  
念爾同為南竄客煙波何事更相違

贈別義興林尹遷官

移家本為採山薇茂宰風流更可依滿徑蓬蒿頻問訊  
開尊竹石幾忘歸高才豈得淹黃綬野性惟甘卧薜衣

今日河梁送君後柴關車馬又應稀

次韻贈施道人

御氣曾聞老氏柔寄身偏愛水雲幽道書數卷只自注  
生計一錢常不留賣藥人間應自謫挂瓢樹下復何憂  
猶言妻子能相累自戴黃冠學遠遊

寄題顧東橋侍郎載酒亭

後世還聞有子雲為耽寂寞卧江濱門前即是尋山路  
座上偏多載酒人祿位已非執戟賤文章真與太玄鄰

欲比侯巴應自笑不知何日望清塵

送樊醫歸南昌

山人自小愛遊方尚說懷歸意不忘別友因留隔歲藥  
還家試解百金裝澄江盡處聞鄉語暮雪深時到草堂  
願爾常如秋後鴈一年好是一來翔

贈張地官督賦江南

皇家財賦重江淮浮濟逾河歲歲來豈謂司農方告匱  
故煩節使遠相催舳艫接水通千里齒草盈筐備五材

民力東南已如此因君一為獻蘭臺

贈南都莫工部子良夏至齋宿署中

萬乘親郊幸北宮千官齋祓兩都同  
靈光正想泥封上清夢遙依輦路通  
煙散玉爐知晝永星分銀燭坐宵中  
聞君已就汾陰賦猶向周南嘆不逢

送彭府倅進賀聖節表

曾叨執戟侍楓宸猶記呼嵩拜舞辰  
獻壽頻將金鏡拂入班許覩玉顏真  
自憐拙疾辭明主因卧丘園作外臣



今日送君何所道祝堯長比華封人

宜興舟中讀徐養齋詩稿因思奉別之久悵然

有懷二首

清溪南望五湖連竹樹陰陰兩岸間桃李孤村春欲盡  
蕪葭遠水思俱聞散帙曲中驚白雪卷帷天末見青山  
故鄉共是投簪客猶恨高蹤不可攀

昨歲相逢冰雪深忽看春色獨驚心清風每憶人如玉  
嘉句堪言字比金四壁荒廬拚自老連洲芳草共誰吟

思君坐惜年華暮明月扁舟試一尋

覽徐養齋見懷毛古菴及小子之作存沒感懷

和韻

早歲曾陪履杖遊遙思墓木已三秋美人去後空聞笛  
芳草歸時獨倚樓世上玉顏還易老山中石髓杳難求  
却慚司馬頻相許擬向清湖共釣舟

和徐養齋移居二首

何年挂却侍中冠新築山居一畝寬種黍聊為終歲計

移花應待早春看  
門依綠樹人稀到  
身謝紅塵夢亦安  
更是謝家兄弟好  
長吟池草對江干

窈窕巖阿叢桂秋清谿一曲  
草堂幽荒園自向閒中翦  
靈藥多從病裏收  
葉上題詩應滿樹  
沙邊載酒不驚鷗  
莫道東山淹謝傅  
蒼生日夕待嘉謀

題贈施心菊醫士

聞道仙翁昔種菊  
君今對菊獨淒神  
蕭條三徑猶含露  
悵望深秋似有人  
肘後傳方多已試  
鼎中留藥不嫌貧

相從何日東籬下願乞餘香慰病身

贈江陰陳君

幽棲選地傍江濱高士風流宿所聞  
身著薜衣稱隱吏園多橘樹比封君  
琴尊不厭丘中賞魚鳥堪為物外羣  
怪爾眉間多道氣年來曾讀五千文

寄劉範東提學

不材因得近園廬窮巷猶存四壁餘  
生計十年思種樹病身終歲強移書  
山僧白社容相往長者高車日與疎

疇昔虛蒙國士待於今櫟散更無如

題伯祖平樂守素齋翁像

國史已收循吏名蠻方猶憶使君清祀留桐縣如朱邑

文諭南夷比陸生

公有華夷  
解諭交趾

湘江又見棠花發

公嘗令  
零陵而

余父於公為從  
孫又守永州

灘浦還聞俎豆成清江傳家自公始高

門大纛豈為榮

和朱子學遷居

辛勤四十有此居生事蕭條只晏如行李隨身一長鋏

疎藤挂壁數椽廬愧無厚祿堪助汝實有高文能起予  
獨惜揚雄名位薄世人誰識太玄書

程副使輓詩

同年舜  
敷之父

帝里風煙幾度逢此行復與仙郎同傾城冠蓋通家後  
故國江山對酒中老憶舊遊經畫省閒尋芳草到禪宮  
亦知今日遊魂處多在清淮白露東

嘉靖丁酉秋余始見公於金陵公留余飲酒自言少  
時為太學生始遊金陵後官於郎曹居此者十餘年

自閒居以來常思雨花牛首之勝輒為之慨然已分  
此生且休矣今老且病誠不自意復能至此每過舊  
遊處歷歷如昨日事乃知江山長在而人命有極牛  
山之淚可復下乎語畢公掀髯而笑余亦歡飲盡醉  
別去至冬而公卒蓋別公後纔四月也嗟乎公而有  
知尚能復來金陵矣乎故予作詩以哀公叙金陵事  
特詳云

元夕詠冰燈

正憐大樹闌春妍忽見清輝映夜闌出海蛟珠猶帶水  
滿堂羅袖欲生寒燭花不礙空中影暈氣疑從月裏看  
為語東風暫相借來宵還得盡餘歡

庚子歲海印寺再舉同年會紀事四首

此下係春坊時作

伐木張新燕攀鱗憶往時重來散花處更是聚星期玉  
佩皆鵷侶金河即鳳池獨憐丘壑質還復接芳儀

淨院早涼生佳賓四座傾花間重識面塔裏舊題名對  
酒憐萍跡聞歌想鹿鳴十年還此會那得更無情



故遊經繡陌初地入松扉可那看花伴年年漸覺稀一  
鐘收宿雨雙樹帶餘暉若問龍池劫誰能不醉歸

梵宮鄰帝苑長此集儒紳檻外諸天界尊前四海人星  
霜別後鬢花月向來春且共攄籌策雲臺早致身

得薛君所寄三遊紀興刻中有楊方洲見懷之

作益別去已十餘年矣撫卷慨然用韻奉答  
昔抗萬言疏還歸四壁居諠才應共惜黷黷更無如顧  
爾猶巖壑慚予濫石渠聖明思直諫早晚下徵書

送黃翠巖赴松江推官任

君本儒家子新詩更出奇  
自宜金馬署暫拜爽鳩司  
海國收魚稻桑田賦繭絲  
南州饒土物知爾一無私

送沈君守寧波

五馬去趨趨孤城積水含  
地收蚶蛤稅人與龍蛇參  
夷貢珠頻入僊書穴可探  
清貧君已慣海味不須甘

送陸舍人調遼府長史

十載紫薇郎長隨玉輦傍  
忽辭漢天子去謁諸侯  
王夢

渚陪游獵蘭臺佐羽觴子虛今在楚作賦有輝光

送王舍人往崑山為顧相公營墓

明主敦耆老藏山借寵恩使臣出左掖秘器給東園舊  
路吳中樹新碑海上原平津衆賓客試問幾人存

聞石屋彭君置生棺有感為賦四詩

青山結淨因回首跡俱陳司馬四壁宅榮期百歲身文  
犧幸知免行蟻待相親試料還真後誰為倚戶人

隱几嗒然安疑君是鵑冠道書時後繫人世鏡中看家

金匱先生集卷二  
本無千橘生常卧一棺不因茲下淚任爾雍門彈

苦欲辭簪紱歸來掩故園無過六百石只對五千言倚  
樹看蜩化逢人笑舌存老龍且莫去為我發狂論

吾與爾皆夢相看一笑時拘拘亦何惡役役尚如斯  
聚桂山中約枯槎海上期胡為更羈縲有愧故人知

寺中訪後渠崔侍郎不遇次韻

為訪高人館聯鑣出近坳並從金地入不見玉山形榻  
尚留僊塵雲疑隔使星無人問奇字載酒只空亭

濟上別錢副使

木落村逾迴，洲迴水更包。  
亂泉春急峽，短日漾寒郊。  
問俗非吾土，逢君似舊交。  
笑談方此始，何事又相拋。

點蒼山歌贈雪屏趙考功

點蒼山十九峰，峰峰巧削玉芙蓉。  
炎天赤日雪不融，峰頂湧出十九泉。  
一峰一泉相縈纏，流到峰前共一川。  
雪花亂落綠波裏，疊島連洲鏡中起。  
是為巨海名西洱，蒙舍當年控百蠻。  
山水中間鑿兩關，一夫守此百不攀。  
聖

代垂裳九夷附此地千秋罷烽戍洱海行人日夜渡剪  
除蓬藿疏街衢歌鍾綺衣盈路隅昔日不毛今雄都山  
中雞犬散不取山下烏蠻種禾黍况乃儒風似鄒魯紛  
紛犀象走王庭怪石亦具山水形畫輦中州作畫屏羨  
君結廬山之窟窓裏諸峰互出没夜夜讀書常映雪十  
年簪笏繫朝班位高官要身不閒惟有清夢到故山余  
亦平生好奇者一說名山心若洒何時與君共坐雪峰  
下

李中麓文選藏書歌

中麓子最好奇平生苦心只自知破塚將尋姬氏籍鑿  
山欲出禹王碑鳥篆蚪文焚後字白雲黃竹刪前詩藏  
在陰厓及海窟神物守護誰得窺自從掇取歸君屋但  
聞胡山鬼夜哭汗牛詎止盈五車插架應知滿萬軸開  
函几席生雲煙五色紛紛耀人目家中綾綺割截盡更  
剪朝衣作裝束中麓子幾歲讀書長閉門自信中郎能  
一目還輕左氏識三墳邇來下筆作詞賦絕似先年石

鼓文却憶射策來京國此時才士紛如雲雕龍白馬爭  
先後一日逢君皆開口試問豹鼠君已知解對黃熊誰  
更有共看飛騰邁等倫早排閭闔上麒麟遂令紈袴生  
嘆息公卿元是讀書人老大無聞予自憐論交多愧十  
年前可道壯心猶未已時復從君乞一編

詹府讌集奉和上宰松臯公三首

祥光虹渚應玄蒼喜溢仙曹薦羽觴七晷萬年徵子聖  
股肱一德見臣良袖携香霧東華上履曳星辰北斗旁



共說疑丞歸大老競將禮樂贊靈昌

御苑先春萬木蒼宮雲曩曩度瓊觴鵷班並引金貂貴  
鴻羽全收玉署良分日傳經清禁裏罷朝起草紫宸旁  
恩波忝竊安能報願祝千秋寶曆昌

玉津晴望鬱蒼蒼環珮初臨試紫觴並向鳳池開勝會  
早從麟角識元良衣冠迴出商巖上雨露偏承幼海旁  
自愧承華箴未就謬將彤管奉明昌

送王翰林浙江兵備副使

同時詞客不如君一劍還將靜海濱  
雞舌舊從香署吏  
虎符新領伏波軍  
帆檣萬里輸蛟織  
樓閣三秋吐蜃雲  
自笑馮郎將白首  
欲從幕下策奇勲

送鄒東郭掌南院

最憐江左風流地  
暫作周南太史公  
通籍總稱鸞掖吏  
分曹獨向鳳臺東  
香携漢署沾新綬  
花近秦淮瞰故宮  
此去談經門下客  
幾人相對坐春風

贈吳山人歸自京師

山人不解機心事早歲藏珍學鹿門住傍巖崖惟四壁  
賦成金石幾千言偶遊卿相多懸榻歸去蓬蒿正滿園  
京洛豈無知已在看君終是厭煩喧

贈許太宰

卿家勲貴似諸袁兩世三登八座尊接席貂蟬開甲第  
成陰桃李在公門身延白屋頻推哺官借青宮獨拜恩  
天子行將問黃髮老臣何以贊嘉言

宿雙塔寺林東城羅念菴誤於郭外相尋不遇


有作見寄用韻奉答

謾向金門學隱淪，獨遊花院散涼氛。  
諸天只在人間世，並馬誰尋野外雲。  
白日金輪臨戶映，香街笙管隔牆分。  
化城本是迷來路，莫訝幽人好避羣。

次韻贈湯將軍

將軍故中山侯之孫也

將軍妙算古人同，料敵常如在目中。  
鏃騎連營寒映月，樓船跨海夜乘風。  
玉門烽火今猶急，桂嶺珠璣久未通。  
却笑封侯應有種，看君百戰立奇功。



荆川集卷二